



**Nunatsinni nerisassiarineqartut pisiniarfinni akiinut suut tunngaviusarnerat pillugu Naalakkersuisut nassuiaasiornissamik peqquneqarnissaannik Inatsisartut aalajangiiffissaattut siunnersuut. Nioqqutissat akitigut pisisartunut pilerinarnerulersinniarlugit qanoq iliortoqarsinnaanera nassuiaammi ilanngullugu tikkuarneqassaaq. Nassuiaat kingusinnerpaamik UKA2025-mi saqqummiunneqarsimassaaq.**

(Inatsisartuni ilaasortaq, Mariane Paviassen Jensen, Inuit Ataqtigiit)

(Siullermeerneqarnera)

Qujanaq Inatsisartunut ilaasortaq Mariane Paviassen Jensen siunnersuummut.

Nunatsinni nerisassaaticut mamartorsuupput, uanga aamma nammineerlunga nerissallugit nuannaarutigisaqisakka. Amerlanerpaasugut namminneerluta piniartarpugut nammineerluta aalisariartarluta , nammineerluta ilaqquttagullu nerisassanik pitsaasunik qerititsivimmiittuuteqarniassagatta.

Aappaatigulli pisiniarfinni nunatsinneerlunik pisineq akisuvoq. Siunnersuuteqartoq ilumoorpoq, akikinnerusartoq avataaniit neqisinissaq nunatsinneertuninngarniik. Tamanna eqqumiiginarsinnaavoq, isumaqanngilangali, eqqumiigissallugu pissutissaqarpallaanngitsoq. Eqqaamassavarpummi, nunalinerneq nunani allani naalagaaffinnit aammalu EU-mit annertuumik tapiissutisarmata, taamaasillutik tuniniaavinni akit appasitsinneqartarneranut pissutaqaataallutik. Taakku saniaticut nunani allani nunalinerneq annertoorujorujussuavoq, taamaattumillu ingerlatsinermut iluaqutit annertuut amerlasuullu, akit appasitsinniarnerannut ilaasarlutik. Taakku marluk nunani taakkunani, neqinik nioqqutissiorfinni, innuttaasunut iluaqutaaginnaratik, aamma uagutsinnut, neqinik eqqussuisunut iluaqutaapput.

Tamanna unammilleruminaappoq. Unammilligassaanngilluinnarlunilu akimik minnerusumik neqeroorfigissallugu, uagut politikikkut aalajanginngikkutta tapiissutit ikiorsiissutitullu tapiissutit annertoorujussuarmik qaffanniarlugit. Tamanna nassuiaateqarnissamik siunnersuummi sukumiinerusumik misissortariaqarpoq. Demokraatiniit kissaatigaarput, nassuiaat sukumiisuussasoq, nunatta karsianut qanoq akeqassanersoq nunatsinni neqit najoqqutigineqartussat akii, nunani allani unammillernartunngussappata.

Siunnersuut taakkuninnga oqaasertalerlugu ataatsimiititaliami susassaartumi suliareqqitassatut innersuunneqarpoq.